
LO DALFINS D'ALVERNE.

7225 , 7614.

LO DALFINS D'ALVERNE si fo coms d'Alverne , uns dels plus savis cavalliers et dels plus cortes del mon , e dels larcs ; e'l meiller d'armas , e que plus saup d'amor e de domnei , e de guerra , e de totz faitz avinens ; e'l plus conoissens e'l plus entendens , e que meils trobet sirventes , coblas e tensos ; e'l plus gen parlans hom que anc fos à sen et à solatz. E per larguesa soa perdet la meitat et plus de' tòt lo sieu comtat ; e per avareza e per sen o sab tot recobrar , e gazaigar plus que nou perdet.

2701 , 7225 , 7614.

REIS , pois que de mi cantatz ,
Trobat avetz cantador :
Mas tan me faitz de paor ,
Per que torn à vos forsatz ,
E plazentiers vos en son.
Mas d'aitan vos ocaison ,
S' oïmais laissatz vostres fieus
No m mandetz querre los mieus.

Qu'eu no soi reis coronatz ,
Ni hom de tan gran ricor
Que posc' à mon fort seignor
Defendre mas heretatz.
Mas vos , cui li Turc felon
Temion mais q'un leon ,
Reis e ducs , e coms d'Angieus :
Sufretz que Gisors es sieus.

Anc no fui vostre juratz
E conoissi ma folor :
Que tan caval mil soudor
E tans esterlins pesatz

Donetz mon cosin Guion ,
So dison siei compagnon
Tostemps segran vostr'estrieus ,
Sol tan larc vos tenga dieus.

Ben par , quan me mandavatz
Qu'eu soli' aver valor ,
Que m laissassetz sordejor ,
Pois que bon me laissavatz ,
Pero dieus m'a fag tan pron ,
Qu'entre'l Puoi et Albusson
Posc remaner entre'ls mieus :
Qu'ieu no son sers ni Judieus.

Seigner valens et honratz ,
Que m'avetz donat aillor ,
Si no sembles camiador
Ves vos m'en fora tornatz.
Mas nostre reis de saison
Rend Usoir' e lais' Usson ;
E'l cobrar es me mot lieus ,
Qu'ieu n'ai sai agut sos brieus.

Qu'eu soi mout entalentatz
De vos e de vostr'amor ;
Que'l coms , queus fetz tan d'onor ,
D'Engolmes n'es gen pagatz :
Que Tolueir'en la maison ,
A guisa de larc baron ,
Li donetz , q'anc non fozt griens ,
So m'a comtat un romieus.

Reis , hoimais me veiretz pron ,
Que tals donna m'en somon ,
Cui soi tan finament sieus
Que totz sos comans m'es lieus.